

四庫全書

經部

欽定四庫全書

經部
左傳事緯卷四

詳校官監察御史_臣周元良

給事中_臣溫常綬覆勘

總校官原任中允_臣王燕緒

校對官中書_臣袁文邵

謄錄監生_臣吳銓

欽定四庫全書

左傳事緯卷四

靈壁知縣馬驥撰

晉靈之弒

文六年靈公少晉人以難故欲立長君趙孟曰立公子雍

好善而長先君愛之且近於秦秦舊好也置善則固事
長則順立愛則孝結舊則安為難故故欲立長君有此
四德者難必抒矣賈季曰不如立公子樂辰嬴嬖於二
君立其子民必安之趙孟曰辰嬴賤班在九人其子何

震之有且為二嬖淫也為先君子不能求大而出在小國辟也母淫子辟無威陳小而遠無援將何安焉杜祁以君故讓偆姑而上之以狄故讓季隗而已次之故班在四先君是以愛其子而仕諸秦為亞卿焉秦大而近足以為援母義子愛足以威民立之不亦可乎使先蔑士會如秦逆公子雍賈季亦使召公子樂於陳趙孟使殺諸郕

七年

秦康公送公子雍於晉曰文公之入也無

衛故有呂卻之難乃多與之徒衛穆嬴日抱大子以啼

於朝曰先君何罪其嗣亦何罪舍適嗣不立而外求君
將焉寘此出朝則抱以適趙氏頓首於宣子曰先君奉
此子也而屬諸子曰此子也才吾受子之賜不才吾唯子
之怨今君雖終言猶在耳而棄之若何宣子與諸大夫
皆患穆嬴且畏偁乃背先蔑而立靈公以禦秦師箕鄭
居守趙盾將中軍先克佐之荀林父佐上軍先蔑將下
軍先都佐之步招御戎戎津為右及堇陰宣子曰我若
受秦秦則寘也不受寇也既不受矣而復緩師秦將生

心先人有奪人之心軍之善謀也逐寇如追逃軍之善政也訓卒利兵秣馬蓐食潛師夜起戊子敗秦師於令狐至於刳首己丑先蔑奔秦士會從之先蔑之使也荀林父止之曰夫人大子猶在而外求君此必不行子以疾辭若何不然將及攝卿以往可也何必子同官為寮吾嘗同寮敢不盡心乎弗聽為賦板之三章又弗聽及亡荀伯盡送其帑及其器用財賄於秦曰爲同寮故也士會在秦三年不見士伯其人曰能亡人於國不能見

於此焉用之士季曰吾與之同罪非義之也將何見焉
及歸遂不見秋八月齊侯宋公衛侯陳侯鄭伯許男曹
伯會晉趙盾盟於扈晉侯立故也公後至故不書所會
凡會諸侯不書所會後也後至不書其國辟不敏也

八年

夏秦人伐晉取武城以報令狐之役晉人以扈之盟

來討冬襄仲會晉趙孟盟於衡雍報扈之盟也遂會伊
維之戎書曰公子遂珍之也十年春晉人伐秦取少

梁夏秦伯伐晉取北徵

十二年

秦伯使西乞術來聘且

言將伐晉襄仲辭玉曰君不忘先君之好照臨魯國鎮撫其社稷重之以大器寡君敢辭玉對曰不腆敝器不足辭也主人三辭賓答曰寡君願徼福於周公魯公以事君不腆先君之敝器使下臣致諸執事以為瑞節要結好命所以藉寡君之命結二國之好是以敢致之襄仲曰不有君子其能國乎國無陋矣厚賄之秦為令狐之役故冬秦伯伐晉取羈馬晉人禦之趙盾將中軍荀林父佐之卻缺將上軍史駢佐之欒盾將下軍胥甲佐

之范無恤御戎以從秦師於河曲史駢曰秦不能久請
深壘固軍以待之從之秦人欲戰秦伯謂士會曰若何
而戰對曰趙氏新出其屬曰史駢必實為此謀將以老
我師也趙有側室曰穿晉君之壻也有寵而弱不在軍
事好勇而狂且惡史駢之佐上軍也若使輕者肆焉其
可秦伯以璧祈戰於河十二月戊午秦軍掩晉上軍趙
穿追之不及反怒曰裹糧坐甲固敵是求敵至不擊將
何俟焉軍吏曰將有待也穿曰我不知謀將獨出乃以

其屬出宣子曰秦獲穿也獲一卿矣秦以勝歸我何以報乃皆出戰交綏秦行人夜戒晉師曰兩軍之士皆未慙也明日請相見也史駢曰使者目動而言肆懼我也將遁矣薄諸河必敗之胥甲趙穿當軍門呼曰死傷未收而弃之不惠也不待期而薄人於險無勇也乃止秦師夜遁復侵晉入瑕十三年春晉侯使詹嘉處瑕以守桃林之塞晉人患秦之用士會也夏六卿相見於諸浮趙宣子曰隨會在秦賈季在狄難日至矣若之何中

行桓子曰請復賈季能外事且由舊勲卻成子曰賈季
亂且罪大不如隨會能賤而有恥柔而不犯其知足使
也且無罪乃使魏壽餘偽以魏叛者以誘士會執其帑
於晉使夜逸請自歸於秦秦伯許之履士會之足於朝
秦伯師於河西魏人在東壽餘曰請東人之能與夫二
三有司言者吾與之先使士會士會辭曰晉人虎狼也
若背其言臣死妻子為戮無益於君不可悔也秦伯曰
若背其言所不歸爾帑者有如河乃行統朝贈之以策

曰子無謂秦無人吾謀適不用也既濟魏人譟而還秦人歸其帑其處者為劉氏

宣元年

晉人討不用命者放

胥甲父於衛而立胥克先辛奔齊

二年

晉靈公不君厚

歛以彫牆從臺上彈人而觀其避丸也宰夫胹熊蹯不熟殺之寘諸畚使婦人載以過朝趙盾士季見其手問其故而患之將諫士季曰諫而不入則莫之繼也會請先不入則子繼之三進及溜而後視之曰吾知所過矣將改之稽首而對曰人誰無過過而能改善莫大焉詩

曰靡不有初鮮克有終夫如是則能補過者鮮矣君能有終則社稷之固也豈唯羣臣賴之又曰衮職有闕惟仲山甫補之能補過也君能補過衮不廢矣猶不改宣子驟諫公患之使鉏麇賊之晨往寢門闢矣盛服將朝尚早坐而假寐麇退歎而言曰不忘恭敬民之主也賊民之主不忠棄君之命不信有一於此不如死也觸槐而死秋九月晉侯飲趙盾酒伏甲將攻之其右提彌明知之趨登曰臣侍君宴過三爵非禮也遂扶以下公噤

夫葬焉明搏而殺之盾曰棄人用犬雖猛何為鬪且出
提彌明死之初宣子田於首山舍於翳桑見靈輒餓問
其病曰不食三日矣食之舍其半問之曰宦三年矣未
知母之存否今近焉請以遺之使盡之而為之簞食與
肉寘諸橐以與之既而與為公介倒戟以禦公徒而免
之問何故對曰翳桑之餓人也問其名居不告而退遂
自亡也乙丑趙穿攻靈公於桃園宣子未出山而復大
史書曰趙盾弑其君以示於朝宣子曰不然對曰子為

正卿亡不越竟反不討賊非子而誰宣子曰嗚呼我之
懷矣自貽伊慼其我之謂矣孔子曰董狐古之良史也
書法不隱趙宣子古之良大夫也為法受惡惜也越竟
乃免宣子使趙穿逆公子黑臀於周而立之壬申朝於
武宮

居乎數千載之下其事不可見也趙盾之獄亦難言
矣弑君之賊明書於經而傳謂趙穿何居無已則穿
之弑而盾之謀乎靈為不道斗擊膳宰其行事誠不

足以為人君雖然豈天性哉君在襁褓未聞誨訓盾秉國政霸業以衰楚人曰北方可圖鄭人曰晉不足與非盾罪乎族子得兵先樹黨與君既不仁臣又不遜至禍成伏甲而跋犬絕領曰君之葬不如臣之葬也豈人臣禮哉乃左氏述孔子之言曰趙盾良大夫也為法受惡惜也越竟乃免此必非孔子之言也夫盾若與聞乎弑即至海外猶將罪之詎以越竟免哉且盾之於人積不能容先都箕鄭之流咸以私憾而

除之矣董狐直書豈反能忍是又知必無其事而趙盾弑其君斷為孔子書法也

鄭靈之弑

宣四年

楚人獻黿於鄭靈公公子宋與子家將見子公之食指動以示子家曰他日我如此必嘗異味及入宰夫將解黿相視而笑公問之子家以告及食大夫黿召子公而弗與也子公怒染指於鼎嘗之而出公怒欲殺子公子公與子家謀先子家曰畜老猶憚殺之而况君乎

反譖子家子家懼而從之夏弑靈公書曰鄭公子歸生
弑其君夷權不足也君子曰仁而不武無能達也凡弑
君稱君君無道也稱臣臣之罪也鄭人立子良辭曰以
賢則去疾不足以順則公子堅長乃立襄公襄公將去
穆氏而舍子良子良不可曰穆氏宜存則固願也若將
亡之則亦皆亡去疾何為乃舍之皆為大夫

十鄭子
年

家卒鄭人討幽公之亂斲子家之棺而逐其族改葬幽
公謚之曰靈

弑君之事可未同而謀哉且以一饌之隙而至於大
逆為人君者不亦難乎知必有所由矣歸生自大棘
戰勝以來權勢驕恣其君必有不能堪者子公故敢
伺釁而動也子公欲弑必與歸生謀之是歸生能制
子公矣不制之而反從之其蓄志寧一日哉斲棺逐
族鄭人要自有公論也

楚越椒之亂

文九年冬楚子越椒來聘執幣傲叔仲惠伯曰是必滅若

教氏之宗傲其先君神弗福也

宣四年

初楚司馬子良

生子越椒子文曰必殺之是子也熊虎之狀而豺狼之聲弗殺必滅若教氏矣諺曰狼子野心是乃狼也其可畜乎子良不可子文以為大感及將死聚其族曰椒也知政乃速行矣無及於難且泣曰鬼猶求食若教氏之鬼不其餒而及令尹子文卒鬪般為令尹子越為司馬為賈為工止譖子揚而殺之子越為令尹已為司馬子越又惡之乃以若教氏之族圍伯嬴於轅陽而殺之遂

處烝野將攻王王以三王之子為質焉弗受師於漳滏
秋七月戊戌楚子與若敖氏戰於臯汭伯棼射王汰斬
及鼓跗著於丁寧又射汰斬以貫笠轂師懼退王使巡
師曰吾先君文王克息獲三矢焉伯棼竊其二盡於是
矣鼓而進之遂滅若敖氏初若敖娶於邲生鬬伯比若
敖卒從其母畜於邲淫於邲子之女生子文焉邲夫人
使棄諸夢中虎乳之邲子田見之懼而歸夫人以告遂
使收之楚人謂乳轂謂虎於菟故命之曰鬬轂於菟以

其女妻伯比實為令尹子文其孫箴尹克黃使於齊還
及宋聞亂其人曰不可以入矣箴尹曰棄君之命獨誰
受之君天也天可逃乎遂歸復命而自拘於司敗王思
子文之治楚國也曰子文無後何以勸善使復其所改
命曰生

楚莊初立外有庸麋百濮之虞內有儀燹越椒之亂
國亦稱多故矣而皆不能為患者莊有以勝之也史
謂莊之立也左鄭姬右越女坐鐘鼓之間三年不出

號令伍舉進諫乃罷淫樂而聽政是蓋三年之內楚
政方怠故庸濮儀燮乘隙交起至于子越之亂則在
三年之外矣勵政方新首干憲典宜其不能久也子
文具知幾之哲良不能從卒為大患及若敖滅王為
立後以勸善焉雖曰善人有後厥為天道而莊王之
權謀霸畧實見於此其為楚之雄主也不亦宜乎

陳靈之弑

宣九年 陳靈公與孔寧儀行父通於夏姬皆衷其相服以

戲於朝洩冶諫曰公卿宣淫民無效焉且聞不令君其
納之公曰吾能改矣公告二子二子請殺之公弗禁遂
殺洩冶孔子曰詩云民之多辟無自立辟其洩冶之謂
乎

十

陳靈公與孔寧儀行父飲酒於夏氏公謂行父

曰徵舒似女對曰亦似君徵舒病之公出自其廐射而
殺之二子奔楚

十

冬楚子為陳夏氏亂故伐陳謂

陳人無動將討於少西氏遂入陳殺夏徵舒轅諸栗門
因縣陳陳侯在晉申叔時使於齊反復命而退王使讓

之曰夏徵舒為不道弑其君寡人以諸侯討而戮之諸侯縣公皆慶寡人女獨不慶寡人何故對曰猶可辭乎王曰可哉曰夏徵舒弑其君其罪大矣討而戮之君之義也抑人亦有言曰牽牛以蹊人之田而奪之牛牽牛以蹊者信有罪矣而奪之牛罰已重矣諸侯之從也曰討有罪也今縣陳貪其富也以討召諸侯而以貪歸之無乃不可乎王曰善哉吾未之聞也反之可乎對曰可哉吾儕小人所謂取諸其懷而與之也乃復封陳鄉取

一人焉以歸謂之夏州故書曰楚子入陳納公孫寧儀行父於陳書有禮也

株林澤陂風詩所以刺靈公也其亦孔之醜哉靈公無道政令急荒火覲而道猶弗水涸而梁不成築臺夏南奪時廢事蓋非止淫亂而已且病民焉已則病民而朝夕說駒於株野政由夏氏又焉免其弑逆乎洩冶知亡昧死直諫使從其言則君不沒於夏南國不夷於九縣諫之益也愈於比干矣二子助惡不悛

卒成廐中之禍春秋於此實深痛之楚人專伺中國
乘釁而動其素智也莊王圖霸鷙乎成穆辰陵之盟
陳成公業已從事矣無端而受孔儀之訟宣言討罪
輒欲有陳詐以濟貪亦何恤乎神明之後也輿論不
協猶立夏州婦淫不誅而納其亂臣其不合於霸討
也明矣夫徵舒大逆陳不能討莊王車裂以徇斯誠
快舉也然而孔儀逢惡擅殺忠臣其罪寧宜末減哉
既誅夏南以謝陳靈亦當誅孔儀以謝洩冶乃徂於

二子之先託強納於陳以亂人國左氏以為有禮無
乃春秋所不許與

楚莊爭霸

宣元

宋人之弑昭公也晉荀林父以諸侯之師伐宋宋

及晉平宋文公受盟於晉又會諸侯於扈將為魯討齊
皆取賂而還鄭穆公曰晉不足與也遂受盟於楚陳共
公之卒楚人不禮焉陳靈公受盟於晉秋楚子侵陳遂
侵宋晉趙盾帥師救陳宋會於榘林以伐鄭也楚為賈

救鄭過於北林囚晉解揚晉人乃還晉人伐鄭以報北
林之役於是晉侯侈趙宣子為政驟諫而不入故不競
於楚 二年春鄭公子歸生受命於楚伐宋宋華元樂
呂御之二月壬子戰於大棘宋師敗績囚華元獲樂呂
及甲車四百六十乘俘二百五十人馘百人狂狡輅鄭
人鄭人入於井倒戟而出之獲狂狡君子曰失禮違命
宜其為禽也戎昭果毅以聽之之謂禮殺敵為果致果
為毅易之戮也將戰華元殺羊食士其御羊斟不與及

戰曰疇昔之羊子為政今日之事我為政與入鄭師故敗君子謂羊斟非人也以其私憾敗國殄民於是刑孰大焉詩所謂人之無良者其羊斟之謂乎殘民以逞宋人以兵車百乘文馬百駟以贖華元於鄭半入華元逃歸立於門外告而入見叔牂曰子之馬然也對曰非馬也其人也既合而來奔宋城華元為植巡功城者謳曰睥其目皤其腹棄甲而復于思于思棄甲復來使其驂乘謂之曰牛則有皮犀兕尚多棄甲則那役人曰從其

有皮丹漆若何華元曰去之夫其口衆我寡夏晉趙盾
救焦遂自陰地及諸侯之師侵鄭以報大棘之役楚鬬
椒救鄭曰能欲諸侯而惡其難乎遂次於鄭以待晉師
趙盾曰彼宗競於楚殆將斃矣姑益其疾乃去之

三年

晉侯伐鄭及邲鄭及晉平士會入盟楚子伐陸渾之戎
遂至於雒觀兵於周疆定王使王孫滿勞楚子楚子問
鼎之大小輕重焉對曰在德不在鼎昔夏之方有德也
遠方圖物貢金九牧鑄鼎象物百物而為之備使民知

神姦故民入川澤山林不逢不若魑魅罔兩莫能逢之
用能協於上下以承天休桀有昏德鼎遷於商載祀六
百商紂暴虐鼎遷於周德之休明雖小重也其姦回昏
亂雖大輕也天祚明德有所底止成王定鼎于郊鄺卜
世三十卜年七百天所命也周德雖衰天命未改鼎之
輕重未可問也夏楚人侵鄭鄭即晉故也

四年冬楚子

伐鄭鄭未服也

五年

楚子伐鄭陳及楚平晉荀林父救

鄭伐陳

六年春晉衛侵陳陳即楚故也楚人伐鄭取

成而還

是為厲之役

七年春衛孫桓子來盟始通且謀會

晉也鄭及晉平公子宋之謀也故相鄭伯以會冬盟於黑壤王叔桓公臨之以謀不睦晉侯之立也公不朝焉又不使大夫聘晉人止公於會盟於黃父公不與盟以賂免故黑壤之盟不書諱之也

八年陳及晉平楚師伐

陳取成而還

九年

會於扈討不睦也陳侯不會晉荀林

父以諸侯之師伐陳晉侯卒於扈乃還楚子為厲之役故伐鄭晉卻缺救鄭鄭伯敗楚師於柳棼國人皆喜唯

子良憂曰是國之災也吾死無日矣

十鄭及楚平諸

侯之師伐鄭取成而還楚子伐鄭晉士會救鄭逐楚師
於潁北諸侯之師戍鄭 十一年春楚子伐鄭及櫟子

良曰晉楚不務德而兵爭與其來者可也晉楚無信我
焉得有信乃從楚夏楚盟於辰陵陳鄭服也楚左尹子
重侵宋王待諸郟令尹蔦艾獵城沂使封人慮事以授
司徒量功命日分財用平板榦稱畚築程土物議遠邇
畧基趾具餼糧度有司事三旬而成不愆於素厲之役

鄭伯逃歸自是楚未得志焉鄭既受盟於辰陵又徵事於晉十二年春楚子圍鄭旬有七日鄭人卜行成不吉卜臨於大宮且巷出車吉國人大臨守陴者皆哭楚子退師鄭人修城進復圍之三月克之入自皇門至於達路鄭伯肉袒牽羊以逆曰孤不天不能事君使君懷怒以及敝邑孤之罪也敢不唯命是聽其俘諸江南以實海濱亦唯命其翦以賜諸侯使臣妾之亦唯命若惠顧前好徼福於厲宣桓武不泯其社稷使改事君夷於

九縣君之惠也孤之願也非所敢望也敢布腹心君實圖之左右曰不可許也得國無赦王曰其君能下人必能信用其民矣庸可幾乎退三十里而許之平潘厖入盟子良出質夏六月晉師救鄭荀林父將中軍先穀佐之士會將上軍卻克佐之趙朔將下軍欒書佐之趙括趙嬰齊為中軍大夫鞏朔韓穿為上軍大夫荀首趙同為下軍大夫韓厥為司馬及河聞鄭既及楚平桓子欲還曰無及於鄭而勦民焉用之楚歸而動不後隨武子

曰善會聞用師觀釁而動德刑政事典禮不易不可敵
也不為是征楚軍討鄭怒其貳而哀其卑叛而伐之服
而舍之德刑成矣伐叛刑也柔服德也二者立矣昔歲
入陳今茲入鄭民不罷勞君無怨讟政有經矣荆尸而
舉商農工賈不敗其業而卒乘輯睦事不奸矣為教為
宰擇楚國之令典軍行右轅左追蓐前茅慮無中權後
勁百官象物而動軍政不戒而備能用典矣其君之舉
也內姓選於親外姓選於舊舉不失德賞不失勞老有

加惠旅有施舍君子小人物有服章貴有常尊賤有等
威禮不逆矣德立刑行政成事時典從禮順若之何敵
之見可而進知難而退軍之善政也兼弱攻昧武之善
經也子姑整軍而經武乎猶有弱而昧者何必楚仲虺
有言曰取亂侮亡兼弱也為曰於鑠王師遵養時晦耆
昧也武曰無競惟烈撫弱耆昧以務烈所可也彘子曰
不可晉所以霸師武臣力也今失諸侯不可謂力有敵
而不從不可謂武由我失霸不如死且成師以出聞敵

彊而退非夫也命為軍帥而卒以非夫唯羣子能我弗
為也以中軍佐濟知莊子曰此師殆哉周易有之在師
䷆之臨䷒曰師出以律否臧凶執事順成為臧逆
為否衆散為弱川壅為澤有力以如已也故曰律否臧
且律竭也盈而以竭天且不整所以凶也不行之謂臨
有帥而不從臨孰甚焉此之謂矣果遇必敗彘子尸之
雖免而歸必有大咎韓獻子謂桓子曰彘子以偏師陷
子罪大矣子為元帥師不用命誰之罪也失屬亡師為

罪已重不如進也事之不捷惡有所分與其專罪六人同之不猶愈乎師遂濟楚子北師次於郢沈尹將中軍子重將左子反將右將飲馬於河而歸聞晉師既濟王欲還嬖人伍參欲戰令尹孫叔敖弗欲曰昔歲入陳今茲入鄭不無事矣戰而不捷參之肉其足食乎參曰若事之捷孫叔為無謀矣不捷參之肉將在晉軍可得食乎令尹南轅反旆伍參言於王曰晉之從政者新未能行令其佐先穀剛愎不仁未肯用命其三帥者專行不

獲聽而無上衆誰適從此行也晉師必敗且君而逃臣
若社稷何王病之告令尹改乘轅而北之次於管以待
之晉師在敖鄆之間鄭皇戌使如晉師曰鄭之從楚社
稷之故也未有貳心楚師驟勝而驕其師老矣而不設
備子擊之鄭師為承楚師必敗彘子曰敗楚服鄭於此
在矣必許之欒武子曰楚自克庸以來其君無日不討
國人而訓之于民生之不易禍至之無日戒懼之不可
以怠在軍無日不討軍實而申儆之于勝之不可保紂

之百克而卒無後訓之以若敖蚡冒簞路監縷以啓山林箴之曰民生在勤勤則不匱不可謂驕先大夫子犯有言曰師直為壯曲為老我則不德而徼怨於楚我曲楚直不可謂老其君之戎分為二廣廣有一卒卒偏之兩右廣初駕數及日中左則受之以至於昏內官序當其夜以待不虞不可謂無備子良鄭之良也師叔楚之崇也師叔入盟子良在楚楚鄭親矣來勸我戰我克則來不克遂往以我卜也鄭不可從趙括趙同曰率師以

來唯敵是求克敵得屬又何俟必從彘子知季曰原屏
咎之徒也趙莊子曰藥伯善哉實其言必長晉國楚少
宰如晉師曰寡君少遭閔凶不能文聞二先君之出入
此行也將鄭是訓定豈敢求罪於晉二三子無淹久隨
季對曰昔平王命我先君文侯曰與鄭夾輔周室毋廢
王命今鄭不率寡君使羣臣問諸鄭豈敢辱候人敢拜
君命之辱彘子以為詔使趙括從而更之曰行人失辭
寡君使羣臣遷大國之迹於鄭曰無辟敵羣臣無所逃

命楚子又使求成於晉晉人許之盟有日矣楚許伯御樂伯攝叔為右以致晉師許伯曰吾聞致師者御靡旌摩壘而還樂伯曰吾聞致師者左射以敢代御執轡御下兩馬掉鞅而還攝叔曰吾聞致師者右入壘折馘執俘而還皆行其所聞而復晉人逐之左右角之樂伯左射馬而右射人角不能進矢一而已麋興於前射麋麗龜晉鮑癸當其後使攝叔奉麋獻焉曰以歲之非時獻禽之未至敢膳諸從者鮑癸止之曰其左善射其右有

辭君子也既免晉魏錡求公族未得而怒欲敗晉師請
致師弗許請使許之遂往請戰而還楚潘黨逐之及榮
澤見六麋射一麋以顧獻曰子有軍事獸人無乃不給
於鮮敢獻於從者叔黨命去之趙旃求卿未得且怒於
失楚之致師者請挑戰弗許請召盟許之與魏錡皆命
而往卻獻子曰二憾往矣弗備必敗彘子曰鄭人勸戰
弗敢從也楚人求成弗能好也師無成命多備何為士
季曰備之善若二子怒楚楚人乘我喪師無日矣不如

備之楚之無惡除備而盟何損於好若以惡來有備不
敗且雖諸侯相見軍衛不徹警也彘子不可士季使鞏
朔韓穿帥七覆於敖前故上軍不敗趙嬰齊使其徒先
具舟於河故敗而先濟潘黨既逐魏錡趙旃夜至於楚
軍席於軍門之外使其徒入之楚子為乘廣三十乘分
為左右右廣鷄鳴而駕日中而說左則受之日入而說
許偃御右廣養由基為右彭名御左廣屈蕩為右乙卯
王乘左廣以逐趙旃趙旃棄車而走林屈蕩搏之得其

甲裳晉人懼二子之怒楚師也使輶車逆之潘黨望其塵使騁而告曰晉師至矣楚人亦懼王之入晉軍也遂出陳孫叔曰進之寧我薄人無人薄我詩云元戎十乘以先啓行先之也軍志曰先人有奪人之心薄之也遂疾進師車馳卒奔乘晉軍桓子不知所為鼓於軍中曰先濟者有賞中軍下軍爭舟舟中之指可掬也晉師右移上軍未動工尹齊將右拒卒以逐下軍楚子使唐狡與蔡鳩居告唐惠侯曰不穀不德而貪以遇大敵不穀之

罪也然楚不克君之羞也敢藉君靈以濟楚師使潘黨
率游闕四十乘從唐侯以為左拒以從上軍駒伯曰待
諸乎隨季曰楚師方壯若萃於我吾師必盡不如收而
去之分謗生民不亦可乎殿其卒而退不敗王見右廣
將從之乘屈蕩尸之曰君以此始亦必以終自是楚之
乘廣先左晉人或以廣隊不能進楚人悉之脫扃少進
馬還又悉之拔旆投衡乃出顧曰吾不如大國之數奔
也趙旃以其良馬二濟其兄與叔父以他馬反遇敵不

能去棄車而走林逢大夫與其二子乘謂其二子無顧
顧曰趙叟在後怒之使下指木曰尸女於是授趙旃綬
以免明日以表尸之皆重獲在木下楚熊負羈囚知瑩
知莊子以其族反之厨武子御下軍之士多從之每射
抽矢敢納諸厨子之房厨子怒曰非子之求而蒲之愛
董澤之蒲可勝既乎知季曰不以人子吾子其可得乎
吾不可以苟射故也射連尹襄老獲之遂載其尸射公
子穀臣囚之以二者還及昏楚師軍於郟晉之餘師不

能軍宵濟亦終夜有聲丙辰楚重至於邲遂次於衡雍
潘黨曰君盍築武軍而收晉尸以為京觀臣聞克敵必
示子孫以無忘武功楚子曰非爾所知也夫文止戈為
武武王克商作頌曰載戢干戈載櫜弓矢我求懿德肆
于時夏允王保之又作武其卒章曰耆定爾功其三曰
鋪時繹思我徂惟求定其六曰綏萬邦屢豐年夫武禁
暴戢兵保大定功安民和衆豐財者也故使子孫無忘
其章今我使二國暴骨暴矣觀兵以威諸侯兵不戢矣

暴而不戢安能保大猶有晉在焉能定功所違民欲猶
多民何安焉無德而強爭諸侯何以和衆利人之幾而
安人之亂以為已榮何以豐財武有七德我無一焉何
以示子孫其為先君宮告成事而已武非吾功也古者
明王伐不敬取其鯨鯢而封之以為大戮於是乎有京
觀以懲淫慝今罪無所而民皆盡忠以死君命又可以
為京觀乎祀於河作先君宮告成事而還鄭伯許男如
楚秋晉師歸桓子請死晉侯欲許之士貞子諫曰不可

城濮之役晉師三日穀文公猶有憂色左右曰有喜而憂如有憂而喜乎公曰得臣猶在憂未歇也困獸猶鬪況國相乎及楚殺子玉公喜而後可知也曰莫余毒也已晉再克而楚再敗也楚是以再世不競今天或者大警晉也而又殺林父以重楚勝其無乃久不競乎林父之事君也進思盡忠退思補過社稷之衛也若之何殺之夫其敗也如日月之食焉何損於明晉侯使復其位冬楚子伐蕭宋華椒以蔡人救蕭蕭人囚熊相宜僚

及公子丙王曰勿殺吾退蕭人殺之王怒遂圍蕭蕭潰
申公巫臣曰師人多寒王巡三軍拊而免之三軍之士
皆如挾纊遂傳於蕭還無社與司馬卯言號申叔展叔
展曰有麥麴乎曰無有山鞠窮乎曰無河魚腹疾奈何
曰目於眚井而極之若為茅經哭井則已明日蕭潰申
叔視其井則茅經存焉號而出之晉原穀宋華椒衛孔
達曹人同盟於清丘曰恤病討貳於是卿不書不實其
言也宋為盟故伐陳衛人救之孔達曰先君有約言焉

若大國討我則死之

十三年

夏楚子伐宋以其救蕭也

君子曰清丘之盟唯宋可以免焉秋赤狄伐晉及清先穀召之也冬晉人討邲之敗與清之師歸罪於先穀而殺之盡滅其族君子曰惡之來也已則取之其先穀之謂乎清丘之盟晉以衛之救陳也討焉使人弗去曰罪無所歸將加而師孔達曰苟利社稷請以我說罪我之由我則為政而亢大國之討將以誰任我則死之 十四年春孔達縊而死衛人以說於晉而免遂告於諸侯

曰寡君有不令之臣違構我敝邑於大國既伏其罪矣
敢告衛人以為成勞復室其子使復其位憂晉侯伐鄭
為邲故也告於諸侯蒐焉而還中行桓子之謀也曰示
之以整使謀而來鄭人懼使子張代子良於楚鄭伯如
楚謀晉故也鄭以子良為有禮故召之楚子使申舟聘
於齊曰無假道於宋亦使公子馮聘於晉不假道於鄭
申舟以孟諸之役惡宋曰鄭昭宋龍尊晉使不害我則必
死王曰殺女我伐之見犀而行及宋宋人止之華元曰

過我而不假道鄙我也鄙我亡也殺其使者必伐我伐我亦亡也亡一也乃殺之楚子聞之投袂而起屨及於室皇劍及於寢門之外車及於蒲胥之市秋九月楚子圍宋孟獻子言於公曰臣聞小國之免於大國也聘而獻物於是有庭實旅百朝而獻功於是有容貌采章嘉淑而有加貨謀其不免也誅而薦賄則無及也今楚在宋君其圖之公說十五年春公孫歸父會楚子於宋宋人使樂嬰齊告急於晉晉侯欲救之伯宗曰不可古

人有言曰雖鞭之長不及馬腹天方授楚未可與爭雖
晉之強能違天乎諺曰高下在心川澤納汙山藪藏疾
瑾瑜匿瑕國君含垢天之道也君其待之乃止使解揚
如宋使無降楚曰晉師悉起將至矣鄭人囚而獻諸楚
楚子厚賂之使反其言不許三而許之登諸樓車使呼
宋人而告之遂致其君命楚子將殺之使與之言曰爾
既許不穀而反之何故非我無信女則棄之速即爾刑
對曰臣聞之君能制命為義臣能承命為信信載義而

行之為利謀不失利以衛社稷民之主也義無二信信無二命君之賂臣不知命也受命以出有死無實又可賂乎臣之許君以成命也死而成命臣之祿也寡君有信臣下臣獲考死又何求楚子舍之以歸夏五月楚師將去宋申犀稽首於王之馬前曰毋畏知死而不敢廢王命王棄言焉王不能答申叔時僕曰築室反耕者宋必聽命從之宋人懼使華元夜入楚師登子反之牀起之曰寡君使元以病告曰敝邑易子而食析骸以爨雖

然城下之盟有以國斃不能從也去我三十里唯命是聽子反懼與之盟而告王退三十里宋及楚平華元為質盟曰我無爾詐爾無我虞

成公

三年春諸侯伐鄭次

於伯牛討邲之役也遂東侵鄭鄭公子偃帥師禦之使東鄙覆諸鄆敗諸丘與皇戍如楚獻捷晉人歸楚公子穀臣與連尹襄老之尸於楚以求知瑩於是荀首佐中軍矣故楚人許之王送知瑩曰子其怨我乎對曰二國治戎臣不才不勝其任以為俘馘執事不以釁鼓使歸

即戮君之惠也臣實不才又誰敢怨王曰然則德我乎
對曰二國圖其社稷而求紓其民各懲其忿以相宥也
兩釋累囚以成其好二國有好臣不與其誰敢德王
曰子歸何以報我對曰臣不任受怨君亦不任受德無
怨無德不知所報王曰雖然必告不穀對曰以君之靈
累臣得歸骨於晉寡君之以為戮死且不朽若從君之
惠而免之以賜君之外臣首首其請於寡君而以戮於
宗亦死且不朽若不獲命而使嗣宗職次及於事而帥

偏師以修封疆雖遇執事其弗敢違其竭力致死無有二心以盡臣禮所以報也王曰晉未可與爭重為之禮而歸之荀瑩之在楚也鄭賈人有將寘諸楮中以出既謀之未行而楚人歸之賈人如晉荀瑩善視之如實出已賈人曰吾無其功敢有其實乎吾小人不可以厚誣君子遂適齊

病霸者楚也春秋何為而予莊王乎晉政日怠諸夏離叛相與俛首而服楚焉辰陵之役經無貶詞說春

秋者遂居然以霸目楚子矣嗚呼聖人豈得已哉晉
自靈公無道文襄霸衰盟會皆出於大夫趙盾驟諫
不入卒有弑逆之禍然猶曰晉侯弱故也諸侯失望
久矣至乎成公之立春秋幸焉兩會諸侯公皆親行
於黃父則執魯宣於扈則伐陳靈正詞討攜張師伐
罪中國庶乎其有霸與而究之陳鄭之郊無日不有
楚師則何居乎曰政在趙氏成公猶靈公也在位不
永志弗克終彼楚莊誠一世之雄也晉方多難奚堪

與抗耶楚欲效桓文之事故強為仁義之言其於陳也既縣而復封之則曰不貪其富於是乎釋陳而得陳矣其於鄭也既入而復和之則曰其君下人於是乎釋鄭而得鄭矣其於宋也既困而復盟之則曰爾無我虞於是乎釋宋而得宋矣邲戰不競晉國震驚清丘弗信衛人渝盟莊王至此豈猶有顧中國者乎知三國之不可取而不取以德為威諸夏盡得故申叔不賀而獻蹊田之諭子反在師而受登床之盟君

臣之間有成謀焉為操為舍總以收中國之霸權也
善哉晉人之料楚也欒武子曰楚自克庸以來其君
不驕隨武子曰民不罷勞君無怨讎夫莊之為莊晉
固已明知之矣知之而猶與戰其罪寧止在彘子哉
晉滅赤狄

宣六年

秋赤狄伐晉圍懷及邢丘晉侯欲伐之中行桓子

曰使疾其民以盈其貫將可殪也周書曰殪戎殷此類
之謂也

七年

赤狄侵晉取向陰之禾

十一年

晉卻成子

求成於衆狄衆狄疾赤狄之役遂服於晉秋會於攢函
衆狄服也是行也諸大夫欲召狄卻成子曰吾聞之非
德莫如勤非勤何以求人能勤有繼其從之也詩曰文
王既勤止文王猶勤况寡德乎

十五年

潞子嬰兒之夫

人晉景公之姊也鄆舒為政而殺之又傷潞子之目晉
侯將伐之諸大夫皆曰不可鄆舒有三雋才不如待後
之人伯宗曰必伐之狄有五罪雋才雖多何補焉不祀
一也耆酒二也棄仲章而奪黎氏地三也虐我伯姬四

也傷其君目五也怙其雋才而不以茂德茲益罪也後之人或者將敬奉德義以事神人而申固其命若之何待之不討有罪曰將待後後有辭而討焉毋乃不可乎夫恃才與衆亡之道也商紂由之故滅天反時為災地反物為妖民反德為亂亂則妖災生故文反正為之盡在狄矣晉侯從之六月癸卯晉荀林父敗赤狄於曲梁辛亥滅潞豐舒奔衛衛人歸諸晉晉人殺之晉侯賞桓子狄臣千室亦賞士伯以瓜衍之縣曰吾獲狄土子之

功也微子吾喪伯氏矣羊舌職說是賞也曰周書所謂庸庸祗祗者謂此物也夫士伯庸中行伯君信之亦庸士伯此之謂明德矣文王所以造周不是過也故詩曰陳錫載周能施也率是道也其何不濟十六年春晉士會帥師滅赤狄甲氏及留吁鐸辰三月獻狄俘晉侯請於王戊申以黻冕命士會將中軍且為大傅於是晉國之盜逃奔於秦羊舌職曰吾聞之禹稱善人不善人遠此之謂也夫詩曰戰戰兢兢如臨深淵如履薄冰善

人在上也善人在上則國無幸民諺曰民之多幸國之不幸也是無善人之謂也

成三年晉郤克衛孫良夫伐

虜咎如討赤狄之餘焉虜咎如潰上失民也

赤狄白狄以衣色名入春秋來世為諸夏之患東則齊當其衝南則鄭當其衝東南則界衛西南則界晉一盛於莊閔之際而齊桓公救邢衛以攘之再盛於僖文之際而晉襄公敗箕以創之中國有霸狄所憚也齊桓衰而狄熾則救齊以伐衛黨叔帶以伐周間

晉文有鄭虞以侵齊乘衛成初歸國以圍衛四十年
間橫行中國未嘗稍挫也晉襄沒而狄逞則侵齊而
又越齊以及魯伐衛而又越衛以及宋狄之無忌較
昔為甚僑如之獲春秋大之然止能殄其一種而未
能滅其族類也及乎宣公之世狄勢亦分蓋衆狄之
中赤狄最彊而赤狄之中潞氏為大比歲侵齊晉人
懼焉攢函之會先離其黨間酈舒之不臣因滅潞而
有其土次及甲氏留吁之屬除惡務盡無俾遺種晉

景之於赤狄也能殲其類矣雖然春秋猶有貶焉鄆舒之亂其罪在下傷君目殺夫人其大惡也鄆舒奔衛潞氏之亂靖矣滅其國而以其君歸非定潞氏實利之焉蹊田奪牛晉能免其讎乎荀林父士會之帥經皆不書至伐虜咎如卻克孫良夫又具書不書之而貶在晉具書之而貶并及衛矣於斯時也楚莊肆虐宋人告急不能出師以爭諸侯而方沾沾赤狄以逞其志則晉之不競於楚也豈無故而遂然

王師敗於茅戎

文十七年秋周甘歆敗戎於邠垂乘其飲酒也

成元年春

晉侯使瑕嘉平戎於王單襄公如晉拜成劉康公徼戎將遂伐之叔服曰背盟而欺大國此必敗背盟不祥欺大國不義神人弗助將何以勝不聽遂伐茅戎三月癸未敗績於徐吾氏秋王人來告敗

若據公穀則皆以晉敗之矣考曲沃叛王以來晉世世無與王為難者胡為而一旦敗王師耶且移誅貿

戎春秋不亦掩惡乎善哉劉氏之言曰聖人立法以垂後世一書王師敗績於茅戎而尊王之義與王自取敗之道及諸侯不勤王之義咸得而見矣

晉景楚共狎盟

宣公十三年春齊師伐莒莒恃晉而不事齊故也 十七年春晉侯使郤克徵會於齊齊頃公帷婦人使觀之郤子登婦人笑於房獻子怒出而誓曰所不此報無能涉河獻子先歸使樂京廬待命於齊曰不得齊事無復命

矣卻子至請伐齊晉侯弗許請以其私屬又弗許齊侯
使高固晏弱蔡朝南郭偃會及斂孟高固逃歸夏會於
斷道討貳也盟於卷楚辭齊人晉人執晏弱於野王執
蔡朝於原執南郭偃於溫苗賁皇使見晏桓子歸言於
晉侯曰夫晏子何罪昔者諸侯事吾先君皆如不逮舉
言羣臣不信諸侯皆有貳志齊君恐不得禮故不出而
使四子來左右或沮之曰君不出必執吾使故高子及
斂孟而逃夫三子者曰若絕君好寧歸死焉為是犯難

而來吾若善逆彼以懷來者吾又執之以信齊沮吾不
既過矣乎過而不改而又久之以成其悔何利之有焉
使反者得辭而害來者以懼諸侯將焉用之晉人緩之
逸秋八月晉師還范武子將老召文子曰變乎吾聞之
喜怒以類者鮮易者實多詩曰君子如怒亂庶遄沮君
子如祉亂庶遄已君子之喜怒以已亂也弗已者必益
之邵子其或者欲已亂於齊乎不然余懼其益之也余
將老使邵子逞其志庶有易乎爾從二三子唯敬乃請

老卻獻子為政 十八年春晉侯衛太子臧伐齊至於

陽穀齊侯會晉侯盟於繒以公子彊為質於晉晉師還
蔡朝南郭偃逃歸夏公使如楚乞師欲以伐齊楚莊王
卒楚師不出既而用晉師楚於是乎有蜀之役

成元
年

為齊難故作丘甲聞齊將出楚師夏盟於赤棘冬臧宣
叔令修賦繕完具守備曰齊楚結好我新與晉盟晉楚
爭盟齊師必至雖晉人伐齊楚必救之是齊楚同我也
知難而有備乃可以逞 二年春齊侯伐我北鄙圍龍

頃公之嬖人盧蒲就魁門焉龍人囚之齊侯曰勿殺吾
與而盟無入而封弗聽殺而膊諸城上齊侯親鼓士陵
城三日取龍遂南侵及巢丘衛侯使孫良夫石稷甯相
向禽將侵齊與齊師遇石子欲還孫子曰不可以師伐
人遇其師而還將謂君何若知不能則如無出今既遇
矣不如戰也夏有

闕文失新
築戰事

石成子曰師敗矣子不少

須衆懼盡子喪師徒何以復命皆不對又曰子國卿也
隕子辱矣子以衆退我此乃止且告車來甚衆齊師乃

止次於鞠居新築人仲叔于奚救孫桓子桓子是以免
既衛人賞之以邑辭請曲縣繁纓以朝許之仲尼聞之
曰惜也不如多與之邑唯器與名不可以假人君之所
司也名以出信信以守器器以藏禮禮以行義義以生
利利以平民政之大節也若以假人與人政也政亡則
國家從之弗可止也已孫桓子還於新築不入遂如晉
乞師臧宣叔亦如晉乞師皆主卻獻子晉侯許之七百
乘卻子曰此城濮之賦也有先君之明與先大夫之肅

故捷克於先大夫無能為役請八百乘許之卻克將中
軍士燮佐上軍欒書將下軍韓厥為司馬以救魯衛臧
宣叔逆晉師且道之季文子帥師會之及衛地韓獻子
將斬人卻獻子馳將救之至則既斬之矣卻子使速以
狗告其僕曰吾以分謗也師從齊師於莘六月壬申師
至於靡笄之下齊侯使請戰曰子以君師辱於敝邑不
腆敝賦詰朝請見對曰晉與魯衛兄弟也來告曰大國
朝夕釋憾於敝邑之地寡君不忍使羣臣請於大國無

令與師淹於君地能進不能退君無所辱命齊侯曰大
夫之許寡人之願也若其不許亦將見也齊高固入晉
師桀石以投人禽之而乘其車繫桑本焉以徇齊壘曰
欲勇者賈余餘勇癸酉師陳於鞏邠夏御齊侯逢丑父
為右晉解張御郤克鄭丘緩為右齊侯曰余姑翦滅此
而朝食不介馬而馳之郤克傷於矢流血及屨未絕鼓
音曰余病矣張侯曰自始合而矢貫余手及肘余折以
御左輪朱殷豈敢言病吾子忍之緩曰自始合苟有險

余必下推車子豈識之然子病矣張侯曰師之耳目在
吾旗鼓進退從之此車一人殿之可以集事若之何其
以病敗君之大事也擐甲執兵固即死也病未及死吾
子勉之左并轡右援枹而鼓馬逸不能止師從之齊師
敗績逐之三周華不注韓厥夢子輿謂已曰且辟左右
故中御而從齊侯邴夏曰射其御者君子也公曰謂之
君子而射之非禮也射其左越於車下射其右斃於車
中綦毋張喪車從韓厥曰請寓乘從左右皆肘之使立

於後韓厥俛定其右逢丑父與公易位將及華泉驂絙
於木而止丑父寢於輶中蛇出於其下以肱擊之傷而
匿之故不能推車而及韓厥執繫馬前再拜稽首奉觴
加璧以進曰寡君使羣臣為魯衛請曰無令輿師陷入
君地下臣不幸屬當戎行無所逃隱且懼奔辟而忝兩
君臣辱戎士敢告不敏攝官承乏丑父使公下如華泉
取飲鄭周父御佐車宛蒺為右載齊侯以免韓厥獻丑
父卻獻子將戮之呼曰自今無有代其君任患者有一

於此將爲戮乎邵子曰人不難以死免其君我戮之不
祥赦之以勸事君者乃免之齊侯免求丑父三入三出
每出齊師以帥退入於狄卒狄卒皆抽戈盾冒之以入
於衛師衛師免之遂自徐關入齊侯見保者曰勉之齊
師敗矣辟女子女子曰君免乎曰免矣曰銳師徒免乎
曰免矣曰苟君與吾父免矣可若何乃奔齊侯以爲有
禮既而問之辟司徒之妻也予之石窳晉師從齊師入
自丘輿擊馬陘齊侯使賓媚人賂以紀甌玉磬與地不

可則聽客之所為賓媚人致賂晉人不可曰必以蕭同叔子為質而使齊之封內盡東其畝對曰蕭同叔子非他寡君之母也若以匹敵則亦晉君之母也吾子布大命於諸侯而曰必質其母以為信其若王命何且是以不孝令也詩曰孝子不匱永錫爾類若以不孝令於諸侯其無乃非德類也乎先王疆理天下物土之宜而布其利故詩曰我疆我理南東其畝今吾子疆理諸侯而曰盡東其畝而已唯吾子戎車是利無顧土宜其無乃

非先王之命也乎反先王則不義何以為盟主其晉實
有闕四王之王也樹德而濟同欲焉五伯之霸也勤而
撫之以役王命今吾子求合諸侯以逞無疆之欲詩曰
布政優優百祿是道子實不優而棄百祿諸侯何害焉
不然寡君之命使臣則有辭矣曰子以君師辱於敝邑
不腆敝賦以攜從者畏君之震師徒撓敗吾子惠徼齊
國之福不泯其社稷使繼舊好唯是先君之敝器土地
不敢愛子又不許請收合餘燼背城借一敝邑之幸亦

云從也況其不幸敢不唯命是聽魯衛諫曰齊疾我矣其死亡者皆親暱也子若不許讎我必甚唯子則又何求子得其國寶我亦得地而紓於難其榮多矣齊晉亦唯天所授豈必晉晉人許之對曰羣臣帥賦輿以為魯衛請若苟有以藉口而復於寡君君之惠也敢不唯命是聽禽鄭自師逆公秋七月晉師及齊國佐盟於爰婁使齊人歸我汶陽之田公會晉師於上鄆賜三帥先路三命之服司空輿師侯正亞旅皆受一命之服九

月衛穆公卒晉三子自役弔焉哭於大門之外衛人逆之婦人哭於門內送亦如之遂常以葬晉師歸范文子後入武子曰無為吾望爾也乎對曰師有功國人喜以逆之先入必屬耳目焉是代帥受名也故不敢武子曰吾知免矣卻伯見公曰子之力也夫對曰君之訓也二三子之力也臣何力之有焉范叔見勞之如卻伯對曰庚所命也克之制也變何力之有焉欒伯見公亦如之對曰變之詔也壬用命也書何力之有焉宣公使求好

於楚莊王卒宣公薨不克作好公即位受盟於晉會晉
伐齊衛人不行使於楚而亦受盟於晉從於伐齊故楚
令尹子重為陽橋之役以救齊將起師子重曰君弱羣
臣不如先大夫師衆而後可詩曰濟濟多士文王以寧
夫文王猶用衆況吾儕乎且先君莊王屬之曰無德以
及遠方莫如惠恤其民而善用之乃大戶已責逮鰥救
乏赦罪悉師王卒盡行彭名御戎蔡景公為左許靈公
為右二君弱皆強冠之冬楚師侵衛遂侵我師於蜀使

臧孫往辭曰楚遠而久固將退矣無功而受名臣不敢
楚侵及陽橋孟孫請往賂之以執斲執鉞織紵皆百人
公衡為質以請盟楚人許平十一月公及楚公子嬰齊
蔡侯許男秦右大夫說宋華元陳公孫寧衛孫良夫鄭
公子去疾及齊國之大夫盟於蜀卿不書匱盟也於是
乎畏晉而竊與楚盟故曰匱盟蔡侯許男不書乘楚車
也謂之失位君子曰位其不可不慎也乎蔡許之君一
失其位不得列於諸侯况其下乎詩曰不解於位民之

攸暨其是之謂矣楚師及宋公衡逃歸臧宣叔曰衡父
不忍數年之不宴以棄魯國國將若之何誰居後之人
必有任是夫國棄矣是行也晉辟楚畏其衆也君子曰
衆之不可以已也大夫為政猶以衆克况明君而善用
其衆乎大誓所謂商兆民離周十人同者衆也晉侯使
鞏朔獻齊捷於周王弗見使單襄公辭焉曰蠻夷戎狄
不式王命淫湎毀常王命伐之則有獻捷王親受而勞
之所以懲不敬勸有功也兄弟甥舅侵敗王畧王命伐

之告事而已不獻其功所以敬親暱禁淫慝也今叔父克遂有功於齊而不使命卿鎮撫王室所使來撫余一人而鞏伯實來未有職司於王室又奸先王之禮余雖欲於鞏伯其敢廢舊典以忝叔父夫齊甥舅之國也而大師之後也寧不亦淫從其欲以怒叔父抑豈不可諫誨士莊伯不能對王使委於三吏禮之如侯伯克敵使大夫告慶之禮降於卿禮一等王以鞏伯宴而私賄之使相告之曰非禮也勿籍

三夏公如晉拜汶陽之田

秋叔孫僑如圍棘取汶陽之田棘不服故圍之冬十一月晉侯使荀庚來聘且尋盟衛侯使孫良夫來聘且尋盟公問諸臧宣叔曰中行伯之於晉也其位在三孫子之於衛也位為上卿將誰先對曰次國之上卿當大國之中中當其下下當其上大夫小國之上卿當大國之下卿中當其上大夫下當其下大夫上下如是古之制也衛在晉不得為次國晉為盟主其將先之丙午盟晉丁未盟衛禮也十二月甲戌晉作六軍韓厥趙括鞅朔

韓穿荀騅趙旃皆為卿賞鞏之功也齊侯朝於晉將授
玉卻克趨進曰此行也君為婦人之笑辱也寡君未之
敢任晉侯享齊侯齊侯視韓厥韓厥曰君知厥也乎齊
侯曰服改矣韓厥登舉爵曰臣之不敢愛死為兩君之
在此堂也

四年

夏公如晉晉侯見公不敬季文子曰晉

侯必不免詩曰敬之敬之天惟顯思命不易哉夫晉侯
之命在諸侯矣可不敬乎秋公至自晉欲求成於楚而
叛晉季文子曰不可晉雖無道未可叛也國大臣睦而

邇於我諸侯聽焉未可以貳史佚之志有之曰非我族類其心必異楚雖大非吾族也其肯字我乎公乃止

五年

夏晉荀首如齊逆女故宣伯餽諸穀宋公子圍龜為

質於楚而歸華元享之請鼓譟以出鼓譟以復入曰習

攻華氏宋公殺之冬同盟於蟲牢鄭服也諸侯謀復會

宋公使向為人辭以子靈之難

六年

二月季文子以鞶

之功立武宮非禮也聽於人以救其難不可以立武立

武由已非由人也三月晉伯宗夏陽說衛孫良夫甯相

鄭人伊雒之戎陸渾蠻氏侵宋以其辭會也師於鍼衛人不保說欲襲衛曰雖不可入多俘而歸有罪不及死伯宗曰不可衛唯信晉故師在其郊而不設備若龍棄之是棄信也雖多衛俘而晉無信何以求諸侯乃止師還是棄信也雖多衛俘而晉無信何以求諸侯乃止師還衛人登陴晉人謀去故絳諸大夫皆曰必居郇瑕氏之地沃饒而近鹽國利君樂不可失也韓獻子新將中軍且為僕大夫公揖而入獻子從公立於寢庭謂獻子曰何如對曰不可郇瑕氏土薄水淺其惡易覲易覲則民

愁民愁則墊隘於是乎有沈溺重脰之疾不如新田土
厚水深居之不疾有汾澮以流其惡且民從教十世之
利也夫山澤林鹽國之寶也國饒則民驕佚近寶公室
乃貧不可謂樂公說從之夏四月丁丑晉遷於新田子
叔聲伯如晉命伐宋秋孟獻子叔孫宣伯侵宋晉命也
楚子重伐鄭鄭從晉故也冬季文子如晉賀遷也晉樂
書救鄭與楚師過於繞角楚師還晉師遂侵蔡楚公子
申公子成以申息之師救蔡禦諸桑隧趙同趙括欲戰

請於武子武子將許之知莊子范文子韓獻子諫曰不可吾來救鄭楚師去我吾遂至於此是遷戮也戮而不已又怒楚師戰必不克雖克不令成師以出而敗楚之二縣何榮之有焉若不能敗為辱已甚不如還也乃遂還於是軍帥之欲戰者衆或謂欒武子曰聖人與衆同欲是以濟事子盍從衆子為大政將酌於民者也子之佐十一人其不欲戰者三人而已欲戰者可謂衆矣商書曰三人占從二人衆故也武子曰善鈞從衆夫善衆

之主也三卿為主可謂衆矣從之不亦可乎

七年鄭子

良相成公以如晉見且拜師秋楚子重伐鄭師於汜諸侯救鄭鄭共仲侯羽軍楚師囚鄭公鍾儀獻諸晉八月同盟於馬陵尋蟲牢之盟且莒服故也晉人以鍾儀歸囚諸軍府八年春晉侯使韓穿來言汶陽之田歸之於齊季文子餞之私焉曰大國制義以為盟主是以諸侯懷德畏討無有貳心謂汶陽之田敝邑之舊也而用師於齊使歸諸敝邑今有二命曰歸諸齊信以行義義

以成命小國所望而懷也信不可知義無所立四方諸
侯其誰不解體詩曰女也不爽士貳其行士也罔極二
三其德七年之中一與一奪二三孰甚焉士之二三猶
喪妃耦而况霸主霸主將德是以而二三之其何以長
有諸侯乎詩曰猶之未遠是用大簡行父懼晉之不遠
猶而失諸侯也是以敢私言之晉樂書侵蔡遂侵楚獲
申驪楚師之還也晉侵沈獲沈子揖初從知范韓也君
子曰從善如流宜哉詩曰愷悌君子遐不作人求善也

夫作人斯有功績矣晉侯使申公巫臣如吳假道於莒與渠丘公立於池上曰城已惡莒子曰辟陋在夷其孰以我為虞對曰夫狡焉思啓封疆以利社稷者何國蔑有唯然故多大國矣唯或思或縱也勇夫重閉況國乎

九年

為歸汶陽之田故諸侯貳於晉晉人懼會於蒲以尋馬陵之盟季文子謂范文子曰德則不競尋盟何為范文子曰勤以撫之寬以待之堅彊以御之明神以要之柔服而伐貳德之次也是行也將始會吳吳人不至

楚人以重賂求鄭鄭伯會楚公子成於鄧秋鄭伯如晉
晉人討其貳於楚也執諸銅鞮樂書伐鄭鄭人使伯蠲
行成晉人殺之非禮也兵交使在其間可也楚子重侵
陳以救鄭冬十一月楚子重自陳伐莒圍渠丘渠丘城
惡衆潰奔莒戊申楚入渠丘莒人囚楚公子平楚人曰
勿殺吾歸而俘莒人殺之楚師圍莒莒城亦惡庚申莒
潰楚遂入鄆莒無備故也君子曰恃陋而不備罪之大
者也備豫不虞善之大者也莒恃其陋而不修城郭泮

辰之間而楚克其三都無備也夫詩曰雖有絲麻無棄
菅蒯雖有姬姜無棄蕉萃凡百君子莫不代匱言備之
不可以已也鄭人圍許示晉不急君也是則公孫申謀
之曰我出師以圍許為將改立君者而紓晉使晉必歸
君年十衛子叔黑背侵鄭晉命也鄭公子班聞叔申之
謀三月子如立公子繻夏四月鄭人殺繻立髡頑子如
奔許繻武子曰鄭人立君我執一人焉何益不如伐鄭
而歸其君以求成焉晉侯有疾五月晉立太子州蒲以

為君而會諸侯伐鄭鄭子罕賂以襄鍾子然盟於修澤
子駟為質辛巳鄭伯歸鄭伯討立君者戊申殺叔申叔
禽君子曰忠為令德非其人猶不可況不令乎

十三
年

六月丁卯夜鄭公子班自訾求入於大宮不能殺子印
子羽反軍於市巳巳子駟帥國人盟於大宮遂從而盡
焚之殺子如子駟孫叔孫知

晉景公即位初年而當楚莊之霸於是乎大創於邲
厥禍烈焉晉自靈成再世不競至是而敗傷為甚於

以振救之亦云難也是冬有清丘之盟其言曰恤病討貳未幾宋伐陳衛救之不討貳也楚伐宋晉不救不恤病也不實其言春秋惡之繼而又有斷道之盟先是四國同聘於齊忿於登臺之一笑踦間而謀奮志同讎是會也齊使見執兵端見矣懼晉者曰諸侯離叛私憾復構晉至此其益衰乎幸晉者曰楚旅幸隕中國改圖晉霸庶乎其再振焉乃楚共雖弱則又為諸夏一勁敵也陽橋之役悉師入援侵衛及魯公

衛入質惟時十三國之君公若而人卿大夫若而人
悉靡然而從於蜀雖成之盟薄穆之厥貉莊之辰陵
於斯為烈焉是役也諸侯畏晉而潰盟晉亦懼衆而
避楚蓋以鞏勝方新楚勢正銳兩大之形為相當矣
然鞏之戰為婦人之笑辱也其辭則曰以大國朝夕
釋憾於魯衛則為魯衛動矣而魯衛附晉矣袁婁之
盟紀甌入晉汶陽入魯齊頃欲尊王於晉而晉不受
兩君且同堂矣則齊附晉矣蜀盟從楚偶壓於勢嗣

是北方諸侯實多睦於盟主焉中惟攝大國而多反覆者一鄭耳是後兩國之兵故多為爭鄭也蟲牢馬陵以前鄭在晉故楚伐之蒲以後鄭在楚故晉伐之鄭服而為會則蟲牢稱善救鄭而為會則馬陵尤善此兩盟者春秋所許也至於蒲乃晉人懼貳而尋盟也春秋乃不許矣耄年志衰釋楚囚以求成大子監國命亦不常楚人乘銳以伐莒鄭人狎侮而圍許晉亦無如之何惟惴惴於鍾儀子商庶乎大國之息我

甲兵爾晉德其衰乎共方盛年景遂忽諸是以晉亦無如楚何也

晉趙氏之難

僖二十四年狄人歸季隗於晉而請其二子文公妻趙衰生

原同屏括樓嬰趙姬請逆盾與其母子餘辭姬曰得寵而忘舊何以使人必逆之固請許之來以盾為才固請於公以為嫡子而使其三子下之以叔隗為內子而已下之

二十八年晉侯作三行以禦狄荀林父將中行屠擊

將右行先蔑將左行

三十一年秋晉蒐於清原作五軍以

禦狄趙衰為卿

文五年

晉陽處父聘於衛反過甯甯嬴

從之及溫而還其妻問之嬴曰以剛商書曰沈漸剛克
高明柔克夫子壹之其不沒乎天為剛德猶不干時况
在人乎且華而不實怨之所聚也犯而聚怨不可以定
身余懼不獲其利而離其難是以去之晉趙成子欒貞
子霍伯白李皆卒 六年春晉蒐於夷舍二軍使狐射
姑將中軍趙盾佐之陽處父至自溫改蒐於董易中軍

陽子成季之屬也故黨於趙氏且謂趙盾能曰使能國之利也是以上之宣子於是乎始為國政制事典正法罪辟獄刑董逋逃由質要治舊滂本秩禮續常職出滯淹既成以授大傅陽子與大師賈佗使行諸晉國以為常法賈季怨陽子之易其班也而知其無援於晉也九月賈季使續鞠居殺陽處父書曰晉殺其大夫侵官也十一月丙寅晉殺續簡伯賈季奔狄宣子使史駢送其帑夷之蒐賈季戮史駢史駢之人欲盡殺賈氏以報焉

史駢曰不可吾聞前志有之曰敵惠敵怨不在後嗣忠
之道也夫子禮於賈季我以其寵報私怨無乃不可乎
介人之寵非勇也損怨益仇非知也以私害公非忠也
釋此三者何以事夫子盡具其帑與其器用財賄親帥
杆之送致諸竟七年狄侵我西鄙公使告於晉趙宣子
使因賈季問鄆舒且讓之鄆舒問於賈季曰趙衰趙盾
孰賢對曰趙衰冬日之日也趙盾夏日之日也八年夷
之蒐晉侯將登箕鄭父先都而使士穀梁益耳將中軍

先克曰狐趙之勲不可廢也從之先克奪蒯得田於董
陰故箕鄭父先都士穀梁益耳蒯得作亂 九年春王

正月己酉使賊殺先克乙丑晉人殺先都梁益耳三月

甲戌晉人殺箕鄭父士穀蒯得

宣二年

初麗姬之亂詛

無畜羣公子自是晉無公族及成公即位乃宦卿之適
而為之田以為公族又宦其餘子亦為餘子其庶子為
公行晉於是公族餘子公行趙盾請以括為公族曰
君姬氏之愛子也微君姬氏則臣狄人也公許之冬趙

盾為旄車之族使屏季以其故族為公族大夫

十五年

晉侯使趙同獻狄俘於周不敬劉康公曰不及十年原叔必有大咎天奪之魄矣

成四年

晉趙嬰通於趙莊姬

五年春原屏放諸齊嬰曰我在故樂氏不作我亡吾

二昆其憂哉且人各有能有不能舍我何害弗聽嬰夢

天使謂已祭余余福女使問諸士貞伯貞伯曰不識也

既而告其人曰神福仁而禍淫淫而無罰福也祭其得

亡乎祭之之明日而亡

八年

晉趙莊姬為趙嬰之亡故


譖之於晉侯曰原屏將為亂欒卻為徵六月晉討趙同
趙括武從姬氏畜於公宮以其田與祁奚韓厥言於晉
侯曰成季之勲宣孟之忠而無後為善者其懼矣三代
之令王皆數百年保天之祿夫豈無辟王賴前哲以免
也周書曰不敢侮鰥寡所以明德也乃立武而反其田
焉
十年晉侯夢大厲被髮及地搏膺而踊曰殺余孫不
義余得請於帝矣壞大門及寢門而入公懼入於室又
壞戶公覺召桑田巫巫言如夢公曰何如曰不食新矣

公疾病求醫於秦秦伯使醫緩為之未至公夢疾為二
豎子曰彼良醫也懼傷我焉逃之其一曰居育之上膏
之下若我何醫至曰疾不可為也在育之上膏之下攻
之不可達之不及藥不至焉不可為也公曰良醫也厚
為之禮而歸之六月丙午晉侯欲麥使甸人獻麥饋人
為之召桑田巫示而殺之將食張如廁陷而卒小臣有
晨夢負公以登天及日中負晉侯出諸廁遂以為殉

趙氏以晉國勲臣聯婚公室自衰及盾兩世執政其

及於民也為孔厚矣乃嬰齊亂淫原屏罹禍姬氏一
譖幾至覆宗雖史稱追論靈公之弑然所謂當其時
不能治也後之人何罪晉之於此為失刑哉同括及
嬰於盾為弟而異母無寵盾卒則其子朔佐下軍焉
同括之流皆非卿也邲之戰二子黨先穀而取敗及
桑隧之役二子復欲戰甚哉輕躁好進是必小才小
智有足以殺其身者惜乎殺之非其罪也韓厥進言
趙氏獲祀猶曰子文無後何以勸善也烏得不動人

君之聽哉景公不明往往妄殺先穀先軫之孫也縱
曰違命罪不至族同括成季之子也為亂無形豈遂
至死天道不爽大厲為祟其言雖不經要可為好殺
者戒云至夫屠岸作難程嬰保孤之說既不合於左
氏亦無取焉



左傳事緯卷四